

IS SIZZIGORRUS DE ZIU MUNDICCU

Su Campusantu de bidde est istètiu costrùiu in su 1856. Finzas a non meda tempus fait, fiat foras de s'abitau, oindì invece est circondau de domus chi hant fattu sparessi totus cussus bellus ortus e fruttettus de aràngius chi ddoi fiant a sa parti a deretta de su stradoni, pesendi a su passu de Genn'e Frongia. Custu fiat unu bellu scenàriu naturali, cun bellas umbras, pò chi passillendi passillendi, pesàt a pei a pigai aria bona in cuss'altura. Ma torrendi a su Campusantu de custu contu, in cussu tempus non fiat aici arriccu comenti de oi, de marmus, tumbas, stàtuas e cappellas, ci fiant pagus spallerias e pagu garas a chini si fait sa tumba prus de lussu o de chini portat is froris prus bellus a is parentis, pò si donai arias e pò fai biri ca si dduus arregordant, mancai non siat berus. Insaras su mortu beniat interrau in terra, in dd'una fossa e su baullu fiat fattu de linna de pagu valori e non certu de nuxi. S'interramortus non fiat mestieri de invidiai e de seguru non fiat traballu leggeru, poita ca issu fiat s'incarrigau de fai sa fossa, a piccu e a pàbia e si fadiat funguda a su mancu duus metrus. Essendi duncas su terrenu de Campusantu, prenu de fossus e sempri traballau cun terras mòvias, ddoi nasciat unu bellu pillu de erba de dogna calidadi, Caraganzu, Narbedda e Narboni, Lisporra, Camingioni, Cima Piuda e po finzas calincunu fundu de Gicòia e de Ambuazza, chi ndi fadiant pesai su disìgiu a is bius pò non nai a is mortus. Po cussu si contat ca in cussus tempus ci fiat calincunu, chi sartiendi su muru de Campusantu, andàt a intru a circai sizzigorris, fiat genti de coru firmu e coraggiosa e chi pagu timiat is pubas e pagu punì is contus chi fueddànt de mortus interraus bius chi si girànt in su baullu lamentendusì e zerriendi agitòrius. Unu de custus fiat unu cernì ziu Mundiccu "su Pranesu", unu minadori chi traballàt a sfundu de puzzu a Ingurtosu, fiat un'òmini onestu, traballanti e ingeniosu, bòffiu beni e respettau de toru sa bidde. Fiat de Iscalepranu, una bella biddixedda de sa zona de su Flumendosa, logu chi in Sardigna est nomenau pò s'ospitalidadi, pò s'ollu de moddizzi, "is culiscionis", pò su casu e pò su pani saboriu. Issu puru, straccu de marrai terras a giornata e de fai su pastori, pò circai traballu stipendiau e assiguru, mancai fessat asutta de terra, fiat arrenèsciu a intrai comenti de minadori, a "Pozzo Gal", in sa miniera de Ingurtosu. Biviat in Arbus, in su bixinau de sa Spèndula chi in cussu tempus fiat conottu comenti de su "bixinau de Sa Spèrrima". Fiat cojau cun Felicia, una bella fèmina traballanti e prexarosa de sa bidde de Foghesu. Ziu Mundiccu, essendi meda credenti, dogna domigu non fadiat de mancu, de andai a primu missa a sa Crèsia de Santu Sebastianu e aici ddi parriat puru de essi in sa Crèsia de bidde sua, poita a Santu Sebastianu cussa Crèsia puru est Santificada. Ziu Mundiccu, essendi babbu de cinqu fillus, pò pòdiri aumentai su pagu dinai de su stipèndiu chi pigàt cun su traballu in miniera, si fiat ingèniau a bendiri sizzigorris. Fiant sizzigorris de un'arrazza portat de bidde sua, chi spaiendiddus in logu chi sceti issu sciriat, hiat fattu incrocciai

cun dd'una *arrazza* de bidde nostra. De custu ammeturu, "Sizzigorràiu" ndi fiat bessida a foras, un'arrazza manna de sizzigorris nieddus cun màncias grogas. Sa genti chi hiat tentu sa fortuna de tastai custa calidadi, naràt ca fiat sa prus savoria chi hiat mai pappau. Fiant is famosus sizzigorris boveris "Babbarroccias Pranesas" chi in Arbus fiant nomenaus e invidiaus, poita ziu Mundiccu non scoviàt a nisciunus aundi ddus agattàt. Medas in bidde hiant provau a incrocciai sizzigorris Arburesus cun sizzigorris Gonnesus, Guspinesus, e Fluminesus, ma nisciunus fiat arrenèsciu a superai pò mannesa, savori e pò bellesas is sizzigorris de ziu Mundiccu "su Pranesu" e custu is sangiosus de bidde non ddu podiant sopportai. Is cumpàngius de miniera contànt ca in ora de barrillocca, ziu Mundiccu non fadiat atru che fueddai de custu sizzigorris e de s'erba selezionada chi serbiat po ddus fai crèsciri e pò rèndiri sa pezza aici savoria, de certu nisciunus podiat immaginai ca cussa erba nasciat il Campusantu aundi is sizzigorris pasciant. Fiat unu segretu chi sceti ziu Mundiccu teniat e chi non ddu scoviàt a nemus, ne mancu a sa pobidde. Medas cumpàngius de traballu hiant circau de sciri aundi ziu Mundiccu andàt a ddus circai, ma nisciunus fiat arrenèsciu a scoberri su logu, poita ca ziu Mundiccu, ddus circat a su notti, in Campusantu, sartiendi su muru, candu su celu fiat crobettu, o candu ci fiat pagu luna Aici, duas o tres bortas a sa cida, a pustis de cena, candu in giru non si birit prus ànima bia e calincunu fiat giai dromiu forroschiendi, a iscusu, cun dd'unu sacchitteddu asutta de brazzus, una candela a carburu e unu bastoneddu de ollastu in manus, ziu Mundiccu, partiat de domu sua, de sa zona de "sa Spèndula" passendi in s'oru de su "riu de Caboni, arribat a su Campusantu, cun dd'unu brìncidu sartiàt su muru e cun dd'unu bastoneddu de ollastu, chi ddi serbiat pò murigai s'erba e sa candela a carburu pò illuminai su logu, in quattu e quattrottu si preniat su sacchittu, cun sizzigorris selezionaus e seberaus, totus a "bucca tostada", cementi sceti issu sciriàt, accanta e asuba de certas tumbas. Prenu su sacchittu, comenti fiat beniu torrat a domu sua. Totu sa cosa hiat funzionau beni po una pariga de annus, ma po isfortuna, unu cumpàngiu de miniera, una notti hiat biu a ziu Mundiccu cun affàriu] suspettu cun su sacchittu asutta de brazzus, camminendi cua cua, rasentendi is murus de totus is domus. Custu cumpàngiu de traballu, fiat unu de cussus prus sangiosus de is sizzigorris de ziu Mundiccu, si zerriat Luisu, nomenclau in bidde comenti de "Grastus", poita ca de picciocheddu giogàt meda a dinai, a gruxis e a grastus. Sa notti de sa scrobetta non podiat pigai sonnu, poita teniat unu pipiu nàsciu de pagu mesis chi hiat cunfundiu sa dì pò sa notti, poita ca fiat fadendi is primus dentixeddus, aici Luisu sa notti fiat incarau in sa ventana, fumendusì una sigaretta "Alfa", in su mentris chi su pipiu si fessat calmau suendi sa titta de sa mamma, aici hiat notau sa puba de ziu Mundiccu passendi cun dd'unu atteggiamentu suspettu, parriat andendi a furai, ma su sacchittu chi portat asutta de is brazzus e sa candela a carburu in manu, dd'hiat fattu cumpèndiri ca forzis hiat scrobettu su segretu de is sizzigorris de ziu Mundiccu "su Pranesu". Luisu, de pressi si fiat bistiu e cazzau e senza de si fai biri, dd'hiat sighiu e dd'hiat biu sartiendi su muru de su

Campusantu cun dd'una agilidadadi de una martinicca. Hiat abettau una pariga de minutus e dd'hiat biu torrendi a sartiai cun su sacchittu prenu, totu suspettosu e castiendusì in giru ci fiat calau conca a bàsciu, torrendi de pressi a domu sua. Su segretu de is sizzigorris de ziu Mundiccu "su Pranesu" fiat scrobettu. Insaras a Luisu, comenti de Arburesu, ddi fiat benia s'idea de fai una bella brullixedda a s'Iscalepranesu. Sa notti a pustis, Luisu hiat abettau in sa ventana su passàggiu de ziu Mundiccu, ma non fiat passau. De sa scrobetta non nd'hiat fueddau cun nisciunus, ni mancu in su traballu. Cun passienza, dogna notti, sunfrendi puru su sonnu e su frius, si poniat in sa ventana, in su mentris chi su fillixeddu dda finessat de pibiai, abettàt su passàggiu de ziu Mundiccu, pò ddi giogai sa "brulla Arburesa" chi hiat pensau. Finzas a candu, una notti, hiat intèndiu unu sonu de crapittas ferradas e a pustis hiat biu a ziu Mundiccu passendi de pressi, castiendi a sa parti e a s'atra. Luisu hiat fattu su giru de "via Cavallotti" pò ddu sorpassai arribau a su Campusantu, timi timi, ci fiat pistincau a intru. Cun su coru battendi comenti de una motopompa pò sa timoria, in su scuriu, si fiat cuau a palas de una bella tumba in marmu, chi fiat sa tumba de cavallieri Lampis, una personalida valorosa Arburesa morta in guerra. Non fiant passaus ni mancu cincu minutus chi Luisu perou fiant pattus cincu oras, ca eccu sartiendi, su Iscalepranesu, chi arzillu che puxi, cun sa candela a carburu e su bastoneddu de ollastu, hiat cumenzau in pressi a murigai s'erba e a assodiri is sizzigorris cun lestresa, Sa notti fiat trista e iscura e intru de cussu logu, parriat ancora prus niedda, sa luna fiat quat e su celu fi marchendi acqua, s'ambienti fadiat spramai, insaras Luisu, cun boxi alta, a nasu tappau pò non si fai conòsciri, hiat cumenzau a zerriai, ***"Nara o Mundiccu "su Pranesu", non ti bastat ancora de m'hai appetigau sa tumba, non ti bastat? Non ti bastat ? Poita no andas a su Campusantu de bidda tua a circai sizzigorris? Hi cumprèndiu? Basta! Tocca! Bai! Bessinci a foras de custu logu e non ti fazzas prus torrai a biri, si non bolis abarraì pò sempri innoi"*** Ziu Mudiccu, intendendi custos fueddus, totu azziccau, hiat cumenzau a cùrriri, e assupendi comenti de una rana de siccu, fiat po finzas arrèsciu cun sa giacca in dd'una gruxi e si dd'hiat tottu scosia e cun dd'unu sàrtidu de campioni de su mundu ci fiat pistincau de su muru currendi comenti de unu maccu ci fiat calau conca a bàsciu a domu sua, po sa pressi po sa timoria, hiat lassau su sacchittu giai prenu de sizzigorris, sa candela a carburu su bastoneddu de ollastu a intru de su Campusantu e de certu in cussu momentu ne teniat gana de recuperai sa cosa. Arriendi che maccu e de pressi, Luisu nd'hiat assoddiu totu, hiat torrau a sartiai su muru e ci fiat calau prexau a domu sua, cun s sacchittu prenu de sizzigorris, sa candela a carburu e su bastoneddu de ollastu. De sa dì, is sizzigorris de Luisu, nomenclingiau "Grastus", fiant bessius in pagu tempus sizzigorris prus famosus e prus apprezziaus de Arbus, totu grazias a s'erba de Campusantu aundi pasciant e chi Luisu, de sa notti famosa hiat cumenzau a circai in cussu logu, cun sa candela a carburu e su bastoneddu de ollastu de Ziu Mundiccu "su Pranesu", chi invece, de sa notti de s'azzicchidu, scramentau, non fiat prus sartiau a Campusantu a circai sizzigorris. Ancora oi,

a pustis tant'annus, calincunu discendenti de cuss'arrazza de sizzigorris esistit ancora in bidde e funt bantaus e circaus, manca, non pasciant prus in s'erba de Campusantu. Ziu Mundiccu "su Pranesu", insaras, po manca coberai calincuna cosa in prus de su stipèndiu de minadori, hiat decèdiu cun is arrispàrmius de pagai is partis a is fradis pò una domixedda de famiglia a Scalepram Po cussu, si fia postu a bèndiri unu ollu, aici fini, chi sa genti fadiat sa filla in dom sua po ddu comporai. Totus si domandànt perou comenti ddu fadessat, poita issu olivàriu non ddi possediat, po iscusa naràt a sa genti, ca fiat ollu chi portàt d Scalepranu, prodùsiu de "olias specialis" de famigliaris. Inveci ziu Mundiccu "su Pranesu", s'ollu ddu fadiat cun su fruttu de sa moddizzi chi in is sattu de Arbus cert non mancàt. Luisu, nominingiau "Grastus", invidiosu e sospettosu, hiat circau d scoberri comenti Ziu Mundiccu si proccuressàt cuss'ollu aici rinomau, ma manca essat provau in totu is modus a ddu scrucullai, non ci fiat arrenèsciu e ziu Mundiccu hiat pòzziu sighi a bèndiri cuss'ollu in tranquillidadi. Oindì, chi si capitessat de intrai a su Campusantu de Arbus, de erba non si ndi bit prus e ni mancu gruxis prantadas in terra. Abarrat ancora sa tumba imponenti de cavallieri Lampis e in gunis accanta, tumba de Luisu, nominingiau "Grastus," chi pò culpa de sa silicosi e de una broncopolmonite mali curada, si fiat mortu a pustis pagu tempus chi fiat andau in pensioni. Po torrai a su conti de ziu Mundiccu "su Pranesu", candu fiat intrau in edadi de pensioni, ci fiat torrau cun sa famiglia a bìviri a bidde sua a Iscalepranu, in sa domixedda chi hiat comporau e arrangiau. Oi, in "piazza Francescangelo Zedda" candu contat a is paesanus de s'edadi sua, su contu de is sizzigorris e de is mortde su Campusantu de Arbus chi zerriànt, no est chi totus ci cretant, ma po spàssiu po ci passai sa di in allirghia, totus si ponint a arriri a scraccàllius. Aici fadeus nos puru, pensendi a is sizzigorris Tunisus e Cinesus chi oindì is Sardus comporant e pappant!!

P.S: I nomi dei personaggi e i fatti della storia, sono frutto della fantasia dell'autore.